

Marere HEBERU Haukia Herekiae

Puka Aona Irerena 'Abina

Puka neiana ererena hanona a'ikakauma haukia baika kebarainakia weiakia ekia a'ikakauma tihabona pokina maearima baika ia tebapo'onakia ba atetua aonai temiaho. Weiana buonai puka neiana ererena ekia a'ikakauma kebataburana. Weiana Keriso ikupaianamo herenai etaina Tirama ena taearea tohakia kebailhanaka.

Puka neianai taba apa'uakia aihau robakia niahunakia. Kori'uaina hanona Iesu hanona Tirama nahuna tohana. Iesu hanopakai emiaho aonai, ia hanona puma bo'ona ehoainakia, mai haiara rarikia ea'inakia ba taearea weianai Tirama ehore Iesu hanona maearima ikoikiai ibaraikia hauna apa'uanai ebaona (2.10). Weiana paunai Iesu hanona mahabanai haukia mai aneru mai Mose etara haonakia. Ibaruana hanona Tirama kipona ehore Iesu ea'i taeana robe haunai keao banaibanai. Ia hanona robe hauna apa'uana kupai, ia hanona herenai etaina maearima ia tia'ikakauma tohana haukia kebamaurinakia. Mose ena hoahoa mai ena rauhubu robakia eahnakia. Weiana hanona Iesu taba ebabaina hauna aubaubana 'abana.

Puka neiana aonai Isaraela maearimakia 'uaikia haukia ekia a'ikakauma orikia bo'okia temiaho (11), ba maearima ekia a'ikakauma nibataburana. Orena hanona ia nibataburanakia weiana atetua taba taba katetabu ahinakia, 'a ia

hanona ekia a'ikakaumai katekori 'ini keaomo 'ariai. Ia mahakia hanona Iesu herenai kemiaho, ena taearai kateka'a, weiana puma mai haiara hanona ekia a'ikakauma a'i katea'i parena (12.1-12).

Puka Paipana Apa'uakia

- a. Roba iahu: Keriso hanona Tirama ibawaira tinana. (1.1-3)
- b. Keriso hanona aneru etara haonakia. (1.4—2.18)
- c. Keriso hanona Mose mai Iosua etara haonakia. (3.1—4.13)
- d. Keriso ena robe akana ena apa'ua. (4.14—7.28)
- e. Keriso ena 'abi'uai ena apa'ua. (8.1—9.28)
- f. Keriso ena baibeni akana ena apa'ua. (10.1-39)
- g. A'ikakauma hanona taba apa'uana. (11.1—12.29)
- h. Bahiahi 'abina mai 'abi orekia. (13.1-25)

Tirama Ena 'Abi Nahuna Pinanai Ehina benaka.

¹ Wa'i baha raninai Tirama ehore mahabanai haukia pinakiai rani bo'ona taeara haeaihaeai ai 'aba'abaka herekiai ehina benakia. ² Ia bariu rani neiakia puakiai hanona Nahuna pinanai aika ehina benaka. Tirama ehore Nahuna imanai kupa mai hanopaka ebabainakia, ia ehore Nahuna etina'ana taba ikoikiai ebena ia 'euna. ³ Nahuna neiana hanona ne'imare Tirama nuabina nibawaira tinana, ia hanona Tirama ihibona tohana, ia ena 'abi hiabunai taba ikoikiai ne'imanakia. Ia maearima ekia

ki'a eutu obonakia murinai kupa 'ubinai hi-abu ikoinai Tiramana itipana taina imariki aina 'ekanai emiati nemiaho.

Tirama Nahuna Hanona Aneru Etara Haonakia.

⁴ Ia hanona aneru etara haonakia pokina Tirama ia atana ebena hauna hanona aneru atakia etara haonakia. ⁵ Tirama ehore ia ehina bena,

“Oi hanona au Naha'u.
Bariu beraura neianai
Au oi abaramani'o,”

Sal 2.7
ia aneru ha herenai ua a'i e'abi aiho. Ia haeamona e'abi,

“Au hanona ia Hamanai kaeao,
ia abomo au Naha'u ai keao.”

2 Sam 7.14
⁶ Haeamona Nahuna apa'uana euhuna hanopakai emai raninai e'abi etibaha,

“Tirama ena aneru ikoikiae
hanona ia temekuti aina.”

Deu 32.43

⁷ Aneru robakia eahuna etibaha,
“Tirama ehore ena aneru
hanona baurai ebaonakia,
ena aneru baika ta'ara'ina tia'i
haukia hanona iruba upakiae
ebaonakia.”

Sal 104.4

⁸ Ia Nahuna robana eahuna etibaha,
“Oi hanona Tirama, emu obia
imia'auna kemiaho banaibana,
oi hanona bero ai emu aiara
nupoki aina.

⁹ Aka bero onuatae aina,

babai ki'a hanona o'oatana.
 Ua buonai Tirama emu Tirama
 ehore aonamo tehoronai
 eheini'o emu obia hoana,
 atamu ebapa'uana
 'abamu wairakiai."

Sal 45.6, 7

¹⁰ Haeamona etibaha,
 "Obiapaka e,
 popouna 'akinai hanopaka
 hanona oi obabaina,
 kupa abomo oi imamuai obabaina.

¹¹ Kupa mai hanopaka
 hanona kate'akauma,
 iamo oi hanona komiaho
 banaibanai,
 ia taba ikoikiai kateburuburu
 habuni 'ai'aina 'abana.

¹² Kupa mai hanopaka kounakia
 habuni iro'abu 'abana,
 weiakia ihakia katehaeai
 habuni ni'ai'ai 'abana.
 Ia oi hanona 'ekamuai mo,
 emu mauri ihaukia hanona
 a'i kepua."

Sal 102.25-27

¹³ Rani ha Tirama aneru ha na a'i ehinabe aihona
 a'i etibaha,
 "Itipa'u tainai momiati
 keaomo oi i'oatamu haukia
 'apumu ba'anai kahorotinakia."

Sal 110.1

¹⁴ Aneru hanona taba? Ia ikoikiai hanona auba,
 Tirama ta'arana tia'i haukia, euhunakia bamauri
 katea'ina haukia katebarainakia.

2

Bamauri Hanona Taba Apa'uana.

¹ Ua buonai 'abi tohana Nahuna pouna aba haona hauna kaha'ima haraina, weiana herenai a'i hamakapare ta'una. ² Tirama ena aneru pinakiai 'aba'abami ehina benakia 'abikia abomo hiabu 'abikiae teao, akakia a'i tebabai 'ao a'i tea'i taeananakia haukia hanona puma eba'oruna hauna tehoaina. ³ Bamauri hanona taba apa'uana, weiana kahabaki'ana raninai puma kemai hauna herenai aika aea kahapihi aiho?

Bamauri neiana hanona Obiapaka kipona aba ehina pou 'uaina, weiana teona haukia tevore tebatohana aika herekai. ⁴ Tirama kipona abomo hoa apa'uakia, bata'uta'u huri akakia, hiabu akakia haeaihaeai ebawaira tinanakia, mai ia ena nuatae ihobonai Auba Robe ebaiben i akipokia tebatohanakia.

Iesu Ke'uai ainaka Bamauri Aonai.

⁵ Tirama hanona aneru a'i etina'anakia, hanopaka mahamahana nimai hauna a'i katepoki aina, bariu hanopaka weiana pouna nahinana. ⁶ Puka robena aonai 'eka ha ɳa erere aihona etibaha,

"Tirama e,
maearima hanona taba?

Ba oi ia nuraona 'inina.

Maearima nahuna hanona taba?

Ba oi ia no'ima haraina.

⁷ Oi ohore rani papana ia obariri
'apuana aneru benukiae,
ia haeamona oi ohore nuabi
mai mariki hoana 'akonai
obabainuna.

⁸ Oi ohore taba ikoikiai
ia ena iha 'ini ba'anai
ohorotinakia."

Tirama taba ikoikiai ia ena iha'ini ba'anai ehorotinakia hanona ia kehore taba ikoikiai keiha 'ininakia. Iamo bariu aika nahaihanakia hanona taba ikoikiai ia ena iha'ini ba'anai aha'i 'abana. ⁹ Ia aika Iesu nahaihana, ia rani papana eriri aneru benukiai, ia 'ari ehau haiara aina paunai Tirama ehore nuabi mai mariki hoana ebabainuaina. Ia 'ari abiabina eonobaina maearima ikoikiai paukiai, weiana hanona Tirama ena aoko'o hoana.

¹⁰ Tirama ena aka hanona ebero, ia hanona taba ikoikiai ebabainakia mai neiha 'ininakia, nahuna bo'okia ena nuabi aonai kebaka totonakia paunai enuatae Iesu kehau haiara ke'oru harai, weianai nahuna bo'okia katemai ena nuabi aonai katemiaho. Iesu ikupaiana mo ke'uai ainakia bamauri aonai. ¹¹ Maearima ekia ki'a neutu obonakia hauna mai ekia ki'a eutu obonakia haukia kipokia hamakia hanona hamona. Ua buonai Iesu a'i nihaumaea ia keaparinakia uaho'abana. ¹² Ia ehore Tirama ehina bena etibaha,

"Oi atamu kahina pouna
uaho'aba'u wairakiai.
Ekia to'u aokiai oi atamu
kabanamona."

Sal 22.22

¹³ Haeamona e'abi etibaha,
"Au hanona Tirama na'ikakaumana."

Isa 8.17

E'abi mue etibaha,
"Au neia'u mai Tirama ehore
nahunai ebena'u haukia kipokia."

Isa 8.18

Iesu Maearima ai Eao Kebarinaka.

¹⁴ Weiakia nahuna na nihoma haukia hanona maearima mai bitiokia abomo mai aruarukia, Iesu kipona ia ihobokiae emai eka hauani maurinai emiaho, weiana ebabaina pokina hanona ena 'ariai Tiaporor 'ari nipoki aina hauna keba'ehona, ¹⁵ abomo ekia mauri beraurakia ikoikiae 'ari teta'u aina ta'arana tea'i haukia kerubu obonakia.

¹⁶ Weiana Iesu hanona aneru a'i nibarainakia, ia Aberahamo 'aba'abana nibarainakia. ¹⁷ Ua buonai ia hanona uaho'abana ihobokiae eao taeara ikoikiae aokiae, ia robe hauna apa'uana keao mai ena aoko'o mai ena aka bero Tirama ena aka nibabaina aonai maearima ekia ki'a kehina haonakia. ¹⁸ Ia kipona baihobo aonai emiaho abomo ehau haiara buonai ia baihobo aonai haukia ibaraikia e'ioquina.

3*Iesu Hanona Mose Etara Haona.*

¹ Ua buonai uaho'aba'u robemi e, wai kipokia Tirama eapari haeamonaka haumi, Iesu katoraona haraina, ia hanona Tirama ena iuhubeau hauna abomo robe hauna apa'uana eka a'ikakaumai pouna nahahinana hauna.

² Mose Tirama ena itu aonai eaka harai ihobonai Iesu hanona euhuna Tiramana ena aka ebabai haraina mai aona ikoinai. ³ Itu ebabaina hauna temarikiae apa'uana ba itu kipona, ihobona Iesu hanona nuabi apa'uana kea'ina ba Mose.

⁴ Itu ikoikiae mai ibabaikia haukia, ba Tirama hanona taba ikoikiae ebabainakia. ⁵ Mose hanona Tirama ena itu ikoinai aonai ta'ara'i haunai eao eaka harai mai aona ikoinai, ia

hanona muriai Tirama taba ke'uhuinakia haukia poukia ehinanakia. ⁶ Iamo Keriso hanona Tirama Nahuna, ia Tirama ena itu nipoki aina mai aona ikoinai. Aika rani ikoinai kaha'ikakauma mai taburaka kahabuabena mai aonamoka raninai aika hanona Tirama ena maearima.

Tirama Ena Maearima Ekia Arai 'Ekana.

⁷ Ua buonai Auba Robe ɳa e'abi aiho,

“Bariu rani neianai

Tirama aiana katona raninai,

⁸ aomi a'i katoba pahihinakia

rani weiana hano'akunai

Tirama tehabona aonai

tebapairi pairi 'abana.

⁹ Weia 'aba'abami ihau bariabui

aokiae e'u aka teihanakia

iomo tehabona'u mai

tebabobona'u.

¹⁰ Ua buonai uru weiana

aopuere aina a'abi atibaha,

‘Aokia hanona atau'a 'akinai

buonai e'u taeara a'i te'io bina.’

¹¹ Weiana aopuere a'abi'uai pahihi

atibaha,

‘Ia hanona e'u arai 'ekanai

a'i katekatoto.’ ”

Sal 95.7-11

¹² Uaho'aba'u e, kato'ima harainimi ha kipona aona a'i kea'i ki'ana ena a'ikakaumai a'i kekaobo mauri Tiramana a'i kekamuriaina. ¹³ 'A Puka robena nehinana ‘bariu rani neiana’ hanona aika eka rani, ua buonai rani ikoinai 'abami kipokia aomi katoba taburanakia, ki'a kehore ena bai'oi ai aomi a'i meba pahihinakia marikina.

14 Eka a'ikakauma ha'iramana hauna kaha'i 'inina keaomo puanai hanona aika Keriso kipokia nahaka haeamo haukai kahaeao.

15 Puka robena na e'abi aiho,
“Bariu rani neianai
Tirama aiana katona raninai
aomi a'i katoba pahihinakia
rani weianai 'aba'abami tebapairi
pairi 'abana.”

Sal 95.7, 8

16 Maearima tabakia Tirama aiana teona iamo tebapairi pairi? Weiakia Mose Aikupito ai ebakarahinakia haukia ikoikiai. **17** Tirama tai eopuere ainakia ihau bariabui aokiai? Maearima weiakia ki'a tebabai hano'akunai te'eho te'ari ore haukia. **18** Tai herekiai Tirama e'abi'uai pahihi benakia ena arai 'ekanai a'i katekatoto na ehoma? Weiiana hanona tai ehina benakia? Weiakia Tirama aiana a'i teka'aina haukia.* **19** Ua buonai aika ha'lobina ekia a'ikakauma aha'i paunai arai 'ekanai a'i tekatoto.

4

Aika Kahatabura Arai 'Ekana Kahakatoto.

1 Tirama ena 'abi'uai aika 'euka ena arai 'ekanai kahakatoto hanona 'ekanai, ua buonai aika kaha'ima harainaka, ha a'i ke'eho arai 'ekana a'i me'ubo aina ta'una. **2** Aika pou namona haona, Isaraela haukia abokiamo 'abi aba teona. Iamo herekiai 'abi teona hauna ena namo aha'i pokina teona haukia a'i tea'ikakauma.

3 Weiiana hanona Tirama e'abi ihobona etibaha, “Aopuere a'abi'uai pahihi atibaha,

* **3:18:** (18) 'ao a'i tea'ikakauma haukia.

‘Ia hanona e'u arai 'ekanai
a'i katekatoto.’ ”

Sal 95.11

Ia aika a'ikakauma hauka hanona ena arai 'ekanai kahakatoto. Aka neiana hanona aba ebaorena hanopaka ebabaina raninai. ⁴ Pokina puka robena aonai wapu iba'abaihau hamomona pouna ehinana etibaha, “Tirama ena aka ikoikiai ebaorenakia ba wapu iba'abaihau hamomonai earai.” ⁵ Haeamona arai robana eahuna etibaha, “Ia hanona e'u arai 'ekanai a'i katekatoto.” ⁶ Weiakia pou namona teo'uaina haukia ekia aiao'o aha'i paunai Tirama ena arai 'ekana a'i tekatoto. Iamo bariu baika hanona ia ena arai 'ekanai katekatoto. ⁷ Weiana paunai rani homa'ana eao murinai Tirama ehore wapu ha ea'i taeana atana eaparina “Bariu rani neiana”, haeamona Davida pinanai wapu weiana pouna ehinana etibaha,
“Bariu rani neianai,
Tirama aiana katona raninai
aomi a'i katoba pahihinakia.”

Sal 95.7, 8

⁸ Iosua arai 'ekana tohana pebenakia raninai Tirama hanona murinai wapu ha a'i pe'uahina. ⁹ Ua buonai ha'iorina Tirama ena maearima katearai ranina hanona nimai ihobona wapu iba'abaihau hamomona 'abana. ¹⁰ Tirama ena arai 'ekanai aba tekatoto haukia hanona ekia akai tiarai ihobona Tirama ena aka ebaorena ba earai 'abana. ¹¹ Ua buonai aika hanona kahatabura arai 'ekana weianai kahakatoto, weiakia aiao'o aha'i haukia 'abakiai a'i kahaeao hau ha arai 'ekana a'i me'ubo aina ta'una.

¹² Pokina Tirama ena 'abi hanona nimauri abomo niaka, eara ki'a baha ba kareba weiana

mahana abira abira teara hauna 'abana, ia hanona eara kekomo rurunaka keaomo aoka mai aubaka herekia huriaka mai ibakai herekiai, weiana maearima ekia raonaraona mai ekia nuatae kebawaira tinanakia. ¹³ Hanopaka tabakia ha Tirama wairanai a'i kebuni 'apua, taba ikoikiae katewaira tina mahanai ba ia herenai aika eka mauri maikoinai pouna kahahinana.

Iesu Hanona Robe Haukia 'Arakiae Hauna Apa'uana.

¹⁴ Aika hanona mai eka robe hauna apa'uana ekara'au eao kupa, ia hanona Iesu Tirama Nahuna. Ua buonai aika hanona eka a'ikakauma pouna nahahinana hauna kaha'i 'inina. ¹⁵ Eka robe hauna apa'uana Iesu hanona eka 'abe'abe 'ekakiae niaoko'o ainaka, neia hanopakai emiaho raninai tehobona taeara haeai haeaiai aika ihoboka, iamo ia herenai hanona ki'a ha aha'i. ¹⁶ Ua buonai mai taburaka kahaeao aoko'o Tiramana ena obia imia'auna herenai, weianai aoko'o apa'uana kaha'ina mai aoko'o hoana kahatabu ahina, eka nuatae ranikiae kebarainaka.

5

Iesu Hanona Eka Bamaauri Pokinai Eao.

¹ Robe haukia apa'uakia ikoikiae hanona maearima baiatakiae Tirama ea'i taeanakia ena aka katebabaina maearima paukiae, beruberu tabakia mai ki'a ia'iobokia tabakia katebaiben. ² Robe hauna apa'uana kehore 'obi aha'i haukia mai beho tibabai haukia keaoko'o ainakiae pokina ia kipona abomo taeara bo'onai ni'abe'abe. ³ Ia kipona abomo ni'abe'abe paunai, maearima

ekia ki'a paukiai mo aha'i, 'a ia kipona ena ki'a ia'iobokia tabakia abomo kebaibeni.

⁴ Hau ha kipona robe hauna apa'uana hoana a'i kea'ina ia Tirama kehore keaparina hauna robe hoana kea'ina, ihobona Arona eaparina 'abana.

⁵ Taeara ihobonai Keriso abomo kipona robe hauna apa'uana hoana a'i ea'ina, ia hoa ebena Tiramana ehina bena etibaha,
“Oi hanona au Naha'u.
Bariu rani neianai au hanona
Hamamuai naeao.”

Sal 2.7

⁶ Puka robenai 'eka haeai ha e'abi etibaha,
“Oi hanona robe haumuai
nomiaho keaomo banaibanai
Melkisedek robe akana
ebabaina 'abana.”

Sal 110.4

⁷ Iesu hanopakai emiaho aonai ia 'ariai kebamaurina Tiramana herenai ebahuba'ari enoi eapari aota mahana mai beina, ba Tirama ia aiana eona pokina kipona ebako'iko'ina Tiramana emariki aina paunai. ⁸ Ia hanona Tiramana Nahuna, iamo ena hauhaiarai Tiramana aiana ika'aina e'ioquina. ⁹ Weianai e'oru harai, ia aiana tika'aina hauquia ikoikiai ekia bamauri banaibanai pokinai eao. ¹⁰ Tiramana ehore Iesu robe hauna apa'uana ai ebaona Melkisedek robe akana ebatina 'abana.

A'i Kahamiaho Oho Miori Papakia 'Abana.

¹¹ Melkisedek ena aka robana katahuna 'abikia hanona ebo'o, iamo ihinahina haraikia hanona tepahihi pokina 'uruna katona hanona obona a'i katobo. ¹² Rani homa'ana toa'ikakauma aba etaina, wai hanona ba'iobi haumi ai patoao, iamo

wai bariu hau ha pehore Tirama ena 'abi tohana pokina peba'obi muenimi. Wai hanona matoha 'ae teinu oho miorikia 'abakia, aniani pahihikia ianikiae a'i tutabura baha. ¹³ Hau ha 'ae neinu oho hauna hanona miori papana, pokina ia bero mai beho a'i e'ibinakia. ¹⁴ Aniani pahihikia hanona maearima apa'uakia 'eukia, ia hanona aokia tebero, namo mai ki'a hoakia aba te'ibinakia.

6

Kahabakiro Kahabai'ima Tirama 'Eunai.

¹ Ua buonai aika hamatabura waira hamaeo Keriso ena ba'obi taburana hama'ina, ia a'ikakauma ba'obikia kori'uaikia haukia herekiae a'i kahamiaho. Neiakia hanona 'ari akakiae naharaona kabe mai Tirama naha'ikakaumana, ² 'uere robe ba'obina mai ahakiae ima tihao'au, abomo 'ariai mikiri mue ba'obina mai miaho banaibana bakaina, a'i kahamue ba'obi neiakia pokikiae. ³ Tirama kenuatae raninai aika hanona kahaka'a waira kahaeao ba'obi taburana herena.

⁴ Maearima baika ekia a'ikakauma te'akauma haukia aea katemue aiho? Ia 'uainai Tirama aokia ebaeanakia, kupa beruberuna teonobaina, Auba Robe kipokia teaka haeamo, ⁵ Tirama ena 'abi namona te'obina abomo Tirama kepoki aina hiabuna teonobaina, ⁶ ba Keriso herenai ti'eho ti'akauma raninai kateraona kabe rani ibaruana katemahamaha hanona a'i ketaina, pokina ia aba imakiae Tirama Nahuna matiu ibiri ropo 'ubinai tikoko 'au muena maearima wairakiae tibahau-maeana.

⁷ Ihobona matoha hano weiana ahanai rani bo'ona abara etibo, aniani namokia nibaramanakia tebiraura haukia 'eukia, hano weiana hanona Tirama ena banamo kea'ina. ⁸ Ia hano weiana ahanai 'ini boaboa mai awa 'ini'inikia te'omu raninai ena namo ha aha'i, Tirama ia aba keururu aina irubai kate'ara ore.

⁹ E'u raona'au haumi e, ua tahinabe pahihi aihonimi, ia ai ta'iobi haraina wai hanona uahomana aha'i, banamo namona keaoainimi bamauri 'ekana. ¹⁰ Tirama hanona tai ha a'i nitaina, emi aka tobabai mai emi raona'au ia atanai aba tobawaira tinana ena robe haukia tobarainakia bariu abomo tubarainakia haukia a'i kereanakia. ¹¹ Ai tanuatae ki'a baha wai ikoimiai aka weianai katotabura keaomo puuanai taba tobuabena hauna katoa'ina. ¹² Wai a'i kato'aboro, 'a ekia a'ikakauma mai ekia bapahihi paukiae Tirama e'abi'uai ai tabakia tea'i maearimakia 'abakiae katoao. Ibabataina hanona nahomana.

Kaha'ikakauma Tirama Ena 'Abi'uai Paunai.

¹³ Tirama ehore Aberahamo herenai e'abi'uai raninai hau ha Tirama a'i etara haona paunai ia kipona atanai 'abi'uai pahihina ebabaina, ¹⁴ etibaha, "Au oi kabanamo tohani'o, ba 'aba'abamu kababo'onakia." ¹⁵ Weiana Aberahamo ebai'ima mai bapahihina eaomo Tirama e'abi'uai hauna ea'ina.

¹⁶ Maearima ha ia etara haona hauna atanai 'abi'uai pahihina kebabaina, 'abi'uai pahihina weiana kehore ena 'abi kebatohana ekia baiara kebapuana. ¹⁷ Ihobonai, Tirama enuatae kebatohana ena 'abi'uai hanona ketoha weiakia ena 'abi'uai tabakia katea'i haukia herekiae, abomo enuatae kate'iorina ia ena raona wairai hauna a'i kebahaeaina, weiana buonai ia 'abi'uai pahihina

ebabaina. ¹⁸ Tirama hanona a'i kebai'oi paunai weiakia rua ena 'abi'uai mai ena 'abi'uai pahi-hina hanona a'i kebahaeainakia, weiana aika hapihi hamai Tirama herenai hauka hanona batabura rarina 'akinai kahakori 'ini wairakai nimai tabana kahabuabena. ¹⁹ Buabeni neiana ha'ina hauna hanona ihobona to'o 'abana eka mauri ai, etabura ebakori 'ininaka kebakatoton-aka kupa marea robenai i'aea huri habuninai kebakabanainaka keaomo erobe ki'a baha 'ekana aonai. ²⁰ Aika paukai Iesu e'uai ekatoto weia robe hauna apa'uanai eao banaibanai, ihobona Melkisedek robe akana ebabaina 'abana.

7

Melkisedek Obia 'Arana Mai Robe Hauna Apa'uana.

¹ Melkisedek neiana hanona Salema obia 'arana abomo 'ubi toha tohanai Tiramana ena robe hauna. Aberahamo ehuardi aiara obiakia eahu 'arinakia emue aonai tebaitabu ahi, Melkisedek ehore Aberahamo ebanamona.

² Aberahamo ehore huari aonai ea'inakia kohukia ikoinai harau haea harau haea aokiai ha ha Melkisedek ebena. Melkisedek atana anina hanona 'aka bero obiana 'arana', haeamona atana Salema obiana anina hanona 'baibua obiana 'arana'. ³ Melkisedek hanona hamana aha'i hinana aha'i, ena itubu aha'i, aita erama aita e'ari a'i ha'io bina, ia orina aha'i, ia hanona ihobona Tirama Nahuna 'abana, robe haunai nemiaho banaibanai.

⁴ Melkisedek weiana katoraonana, ia aea eapa'ua aiho! Aika 'aba'abaka Aberahamo huari ai ea'i kohukia namokia harau haea harau haea aokiai ha ha ia ebena. ⁵ Weiakia Lebi itubuna

haukia robe hoana tea'ina paunai, rauhubu e'abi, Aberahamo 'aba'abana Isaraela haukia ekia kohu ikoikiae harau haea harau haea aokiae ha ha uaho'abakia Lebi itubuna katebenakia.
⁶ Melkisedek hanona Lebi itubuna hauna aha'i, iamo Aberahamo herenai ena kohu ikoikiae harau haea harau haea aokiae ha ha ea'ina ba ia ehore Aberahamo weiana Tirama ena 'abi'uai ea'ina hauna ebanamona. ⁷ Aika ha'io bina hoa apa'uana ea'ina hauna kehore hoa papana ea'ina hauna kebanamona.

⁸ Robe haukia hanona maearima ekia kohu harau haea harau haea aokiae ha ha tea'inakia, Melkisedek abomo Aberahamo ena kohu harau haea harau haea aokiae ha ha ea'inakia, ia robe haukia hanona kate'ari, ia Melkisedek hanona nemiaho banaibana Puka robenai e'abi ihobona.
⁹ Na hama'abi aiho, Lebi haukia maearima ekia kohu harau haea harau haea aokiae ha ha tea'inakia, ia Aberahamo ena kohu harau haea harau haea aokiae ha ha Melkisedek ebena aonai Lebi ena itubu haukia abokiamo ekia kohu harau haea harau haea aokiae ha ha tebaiben'i abana. ¹⁰ Pokina Melkisedek Aberahamo ohi tebaitabu ahi aonai Lebi hanona a'i erama baha ia 'aba'abana Aberahamo huaninai emiaho.

Iesu Ihobona Melkisedek.

¹¹ Tirama Isaraela haukia rauhubu ebenakia Lebi itubuna haukia robe akana katebabaina. Ia Lebi itubuna robe akana tebabai haraina iamo aka weiana hanona maearima a'i teba beronakia Tirama wairanai paunai robe hauna haeai ha kewaira tina keaka matoha Melkisedek 'abana, ia Arona 'abana aha'i. ¹² Robe haukia katehaeai hanona rauhubu abomo kehaeai. ¹³ Weiana robana hahuna hauna hanona itubu haeai hauna, Lebi itubuna hauna aha'i, itubu

weiana aonai hanona hau ha itara robena akana a'i ebabai 'apuana. ¹⁴ Weiiana aba ha'iobi haraina eka Obiapaka hanona Iuda itubunai erama, 'a Mose robe haukia ha itubu weianai a'i ea'i taeana.

¹⁵ Taba nahauahina hauna aba ha'iobi haraina pokina robe hauna haeai ha aba ewaira tina, ia Melkisedek 'abana. ¹⁶ Ia robe haunai eao hanona maearima ekia rauhubu 'ao ekia taearai aha'i, ia mauri hiabuna nemiaho banaibanalai haunai.

¹⁷ Puka robenai na e'abi aiho,

“Oi hanona robe haumuai
nomiaho keaomo banaibanalai,
Melkisedek robe akana
ebabaina 'abana.”

Sal 110.4

¹⁸ Weiiana rauhubu 'ai'aina aba tea'i obona, pokina ia hanona e'abe'abe abomo ena aka aha'i.

¹⁹ Mose ena rauhubu ai maearima a'i ebaberonganakia Tirama wairanai. Ua buonai Tirama ehore buabeni namona ha ebenaka weiana hanona rauhubu etara haona, weianai nahaeao Tirama herena.

²⁰ Haeamona Tirama mai ena 'abi'uai pahihinai Iesu robe haunai ebaona. Weiakia Lebi itubuna haukia robe haukiai teao hanona Tirama ena 'abi'uai pahihinai aha'i. ²¹ Ia Iesu robe haunai eao hanona Tirama ena 'abi'uai pahihinai. Tirama na e'abi aiho,

“Obiapaka hanona ena 'abi'uai
pahihina ebabaina
ia ena 'abi a'i kebahaeaina,
‘Oi hanona robe haumuai nomiaho
keaomo banaibanalai.’ ”

Sal 110.4

22 Na homana Iesu hanona 'abi'uai apa'uana neiana ibatohana haunai eao, 'abi'uai neiana hanona 'abi'uai apa'uana 'ai'aina etara haona.

23 Robe haukia hanona tebo'o pokina ia te'ari ekia akai a'i temiaho banaibana. **24** Ia Iesu hanona kemiaho banaibana, ena robe akana hanona a'i keao hau ha herena. **25** Ia nemiaho banaibana abomo aika paukai ia Tirama ninoina paunai, ia atanai Tirama herena kateao haukia kebamauri orenakia.

26 Iesu neiana hanona robe hauna apa'uana eka nuatae ikoikiai e'iobi. Ia hanona erobe, beho 'ao ki'a ha ia herenai aha'i, ia hanona ki'a haukia baiatakiai aha'i kupa 'ubina tohanai ekara'au. **27** Ia hanona robe haukia weiakia ihobokia aha'i, robe haukia ha ha hanona rani ikoikiai kipona ena ki'a ihina haona akanā kebabai 'uaina murinai maearima ekia ki'a ihina haokia akakia kebabai. 'A Iesu hanona ua a'i kehoma, pokina ia kipona ena mauri ebaiben'i ki'a ia'i obona tabanai eao, ia rani hamonai aka weiana maikoina ebaorena. **28** Mose ena rauhubu ehore maearima ea'i taeanakia robe haukiai teao, ia te'abe'abe, 'a Tirama ena 'abi'uai pahihina rauhubu murinai emai hauna ehore Tirama Nahuna ea'i taeana ia abe'oru harai robe hauna apa'uanai eao ia hanona kemiaho banaibana.

8

Iesu Hanona Eka Robe Hauna Apa'uana Kupai.

1 Au robana ahuna 'abikia pokikia hanona neiana, aika hanona robe hauna apa'uana nahomana hauna nemiaho herekai. Ia kupa 'ubinai hiabu Tiramana ena imia'au itipana

taina imarikiaina 'ekanai aba emiati. ² Ia 'eka robena tohanai robe hauna apa'uana ena aka nibabaina, paraboa* tohana weiana hanona Obiapaka Tirama ehore ebakorina ia maearima a'i tebakorina.

³ Robe haukia apa'uakia ikoikiai tea'i taeanakia beruberu tabakia katebaiben'i mai ki'a ia'io bokia tabakia katebaiben'i Tirama herenai, ua buonai eka robe hauna apa'uana neiana abomo taba ha kebaiben'i. ⁴ Iesu hanopakai pemiaho raninai robe haunai a'i peao, pokina robe haukia temiaho ia tehore beruberu tabakia tebaiben'i Mose ena rauhubu ihobonai. ⁵ Robe haukia ekia aka hanona kupa ai tibabaina akana ihobo ihobona mai aubaubana 'abana, aka weiana hanona ihobona Tirama Mose ehinabe pahi-hina paraboa robena ebakorina 'abana etibaha, "Ko'ima haraina taba ikoikiai kobabai oeo ai abaihani'o tabakia ihaihakia ihobo ihobokia." ⁶ Ia bariu Iesu robe akana ea'ina hanona robe haukia ekia aka etara haonakia, pokina ia 'abi'uai apa'uana weianai bairarao haunai eao, 'abi'uai apa'uana neiana hanona ma enamo ba 'abi'uai apa'uana 'ai'aina, pokina weiana hanona 'abi'uai namokia 'akikia ahakiai ebakorina.

*'Abi'uai Apa'uana Mahamahana Hanona
Ai'aina Etara Haona.*

⁷ 'Abi'uai apa'uana kori'uaina maikoinai enamo raninai, ibaruana a'i pahanuatae aina. ⁸ Ia Tirama ena maearima herekiai beho eihana buonai ehinanakia etibaha,
"Au, Obiapaka Tirama, na'abi,
Beraura aba nimai 'abi'uai

* **8:2:** (2) i'aua robena

apa'uana mahamahana kababaina
 Isaraela haukia herekiae
 abomo Iuda itubuna aonai.

⁹ Au, Obiapaka Tirama, na'abi,
 'Abi'uai apa'uana neiana
 hanona 'aba'abakia imakiae
 a'ina Aikupito hanonai
 abakarahinakia raninai
 a'abi'uai hauna 'abana aha'i.
 Ia e'u 'abi'uai apa'uana
 a'i teka'aina buonai
 au abomo aiakia a'i aona."

¹⁰ Au, Obiapaka Tirama,
 haeamona na'abi,
 Weiana murinai 'abi'uai apa'uana
 ha kababaina Isaraela haukia
 herekiae hanona neiana.
 Au e'u rauhubu ia aokiae
 kahorotina mai ahekiae karerena.
 Au hanona ekia Tirama ai kaeao,
 ia hanona au e'u maearima ai
 kateao.

¹¹ Hau ha uaho'abana 'ao
 herenai hauna a'i kehina bena
 'Obiapaka ko'io'bina'.

Pokina ikoikiae hanona
 aba kate'io'bina'u
 papana 'akiae eaomo
 apa'uanai epua.

¹² Ekia beho akakia aokiae
 kaoko'o ainakiae
 abomo ekia ki'a
 a'i karaona 'ininakiae."

Ier 31.31-34

¹³ Tirama 'abi'uai apa'uana mahamahana
 e'uhina raninai weiana kori'uaina hanona aba

'ai'ainai ebaona, ba taba ni'ai'ai mai nimara hauna hanona aba ke'akauma.

9

'Abi'uai Apa'uana 'Ai'aina.

¹ 'Abi'uai apa'uana kori'uaina hanona mai ena kuti rauhubukia mai kuti 'ekana, 'eka weiana hanona maearima imakiai tebabaina. ² Paraboa tebakorina ba tekaihurina ikaihuri rua, atapaka tainai ikaihuri atana teaparina Robe 'ekana. Robe 'ekana aonai hanona ramepa horoti 'ekana ha mai itara papana ha, ahanai baiben parawana tehorotina Tirama 'euna. ³ I'aeahuri habunina ibaruana aona tainai hanona teaparina Erobe ki'a baha 'ekana. ⁴ Weiana aonai hanona itara robena ha tebabaina gold ai tebahu abuna ahanai nabunabu timina namona tekinena, abomo 'abi'uai apa'uana mauana ha hauna maikoinai gold ai tebahu abuna, maua aonai hanona gold urona ha aonai mana teutana hauna mai Arona ena ikai'ini weiana 'uainai ebubuhi rauna tekarahi hauna mai pi-hara panabakia rua ahakiai rauhubu tererenakia haukia. ⁵ Maua ikaiabuna ubinai hanona teaparina Ki'a ihina haona 'ekana, Tirama ena nubabi aneru 'abakia ibabataikia rua atakia Kerubi, banikiai 'eka weiana tehao abuna. Bariu hanona taba neiakia ikoikiai a'i kahinahina harainakia.

⁶ Taba weiakia ua teba'oru aihonakia, weiana robe haukia hanona rani ikoikiai ikaihuri kori'uaina aonai tekatoto ekia aka tebabainakia. ⁷ Ia ikaihuri ibaruana hanona robe hauna apa'uana ikupaiiana mo ihau ha aonai rani hamona ekatoto, imana 'abaeana a'i ekatoto, ia aruaru ea'ina etoto aina ia kipona ena ki'a

paunai abomo maearima ekia ki'a a'i te'io bina aonai tebabaina haukia paukiai.⁸ Taba weiakiai Auba Robe aba eba'obi harainaka, robe 'ekana kori'uaina ekoroti nemiaho aonai taeara keao erobe ki'a baha 'ekana hanona a'i nikaikau bahana.⁹ Neiakia hanona ibabatai 'abakia bariu rani neiana 'euna. Taeara weianai beruberu tabakia mai ki'a ihina hao tabakia tibaibeni Tirama 'euna, iamo weiakiai kuti haukia aokia tohana a'i katebabero toha tohana.¹⁰ Weiakia hanona aniani tabakia inuinu tabakia mai 'uere hoahoakia, hauani ena rauhubu 'abaeakia, ia kateaka keaomo Tirama taeara kebamahamaha muenakia raninai.

'Abi'uai Apa'uana Mahamahana.

¹¹ Ia bariu Keriso aba emai terama tabakia namokia ekia robe hauna apa'uanai eao, paraboa weiana eapa'ua mai e'oru harai hauna aonai ekatoto, weiana hanona maearima imakiai a'i tebabaina abomo hanopaka 'euna aha'i.¹² Keriso paraboa aonai ekatoto raninai, nani 'ao poromakau nahukia aruarukia a'i ea'i ia kipona ena mauri ebaibeni aruarunai ekatoto, rani hamonai mo erobe ki'a baha 'ekana aonai ekatoto, weianai bamauri banaibanai akana ebaorena aika paukai.¹³ Maearima te'opu Tirama wairanai raninai, nani poromakau aruarukia mai poromakau irubai teba'ara obonakia rabukia haukiai tekapo otarainakia, ba haukia temahamaha terobe Tirama wairanai.¹⁴ Weiana hanona 'abi tohana iamo Keriso aruaruna hanona weiakia etara haonakia. Keriso hanona ena ki'a 'ao ena beho ha aha'i, ia miahō banaibanai Auba Robena ena baraibarai ai kipona ena mauri baibeni tabanai ebaona Tirama ebena. Keriso aruaruna

weiana hanona aoka tohana kebamaha mahana,
weiakia anikia aha'i hoakia herekiai kaha kapare
kahaeao mauri Tiramana ena aka kahababaina.

Keriso Aruarunai 'Abi'uai Apa'uana Mahamahana Ebatohana.

¹⁵ Ua buonai Keriso hanona bairarao haunai eao 'abi'uai apa'uana mahamahana kebataburana. Ia maearima ekia ki'a weiakia 'abi'uai apa'uana 'ai'ainai temiaho aonai tebabainakia haukiai kerubunakia paunai e'ari, ba Tirama eaparinakia haukia hanona banamo banaibanai Tirama e'abi'uai aina hauna katea'ina.

¹⁶ Ke'ari hauna ena nuatae 'abi'uaina hanona a'i keaka keaomo ena 'ari katebatohana murinai nuatae 'abi'uaina weiana hanona keaka. ¹⁷ 'Ari hauna ena nuatae 'abi'uaina hanona e'abi'uai hauna ke'ari ba 'abi'uai hiabuna keaka, ia a'i e'ari nemiaho oho aonai 'abi'uai weiana hanona hiabuna aha'i. ¹⁸ Weiana buonai 'abi'uai apa'uana kori'uaina abomo 'ari aruarunai 'abi'uai hiabuna eaka. ¹⁹ Kori'uaina Mose ehore rauhubu 'abina ena maearima ikoikiai eba'ibinakia, weiana murinai poromakau nahukia aruarukia nani aruarukia mai bei kipokia ea'i haeamona, mamoe buirana birona mai wapaea rauna kipokia ea'inakia ekaihuna, rauhubu pukana mai maearima ikoinai ahakiai ekapo otaraina. ²⁰ Ba e'abi etibaha, "Neiana hanona 'abi'uai apa'uana aruaruna, Tirama ehina benimi katoa'i taeana." ²¹ Taeara ihibonai Mose aruaruai paraboa robena ahanai ekapo otaraina mai robe akana tibabai tabakia ikoikiai abomo ahakiai ekapo otarinakia. ²² Mose ena rauhubu eba'ibinaka taba bo'okia hanona

aruaru kehore kebamaha mahanakia, ia aruaru a'i kekiki oioi raninai ki'a ihina haona keaha'i.

²³ Paraboa aona tabakia neiakia kupa tabakia ibabataikia hanona taeara uahomanai patebamaha mahanakia, ia kupa tabakia tohakia hanona baibeni namona 'akinai katebamaha mahanakia. ²⁴ Keriso hanona 'eka robena maearima imakiai tebabaina hauna aonai a'i ekatoto, 'eka weiana hanona 'eka robena tohana ibabataina, 'a ia hanona kebarainaka paunai 'eka robena tohana kupa 'ubinai hauna aonai ekatoto eao Tirama wairanai.

²⁵ Robe haukia apa'uakia hanona ihau ha ha aokiai mahi aruarukia tea'i erobe ki'a baha 'ekanai tekatoto. Ia Keriso hanona rani bo'ona ua a'i kehoma. ²⁶ Ua pehoma raninai, hanopaka ea'i ramana raninai emai mo bariu Keriso hanona rani bo'ona pehau haiara. Ia Keriso rani hamona mo ewaira tina rani neiakia puakiai, kipona baibeni tabanai eao ki'a ia'ibona. ²⁷ Maearima ha ha hanona rani hamonai kate'ari, murinai Tirama kebabakainakia. ²⁸ Taeara ihibonai Keriso hanona rani hamona mo baibeni tabanai eao mako ekia ki'a ia'i obokia. Ia haeamona kewaira tina mue hanona te'imana haukia kebamaurinakia paunai, ia ki'a ia'i obokia paunai aha'i.

10

Keriso Huanina Rani Hamona Ikoinai Paunai Ebaiben.

¹ Mose ena rauhubu hanona taba namona wairai kemai hauna aubaubana, taba tohana aha'i. Rauhubu taearanai maearima ekia ki'a ia'i obokia tabakia ihau ha ha ihibokia tebaiben, iamo weiakia hanona Tirama herenai katekuti

haukia a'i katebabero harainakia. ² Baiben
neiana pehore Tirama tekuti aina haukia ekia ki'a
rani hamonai pebamaha mahanakia raninai, ia
kipokia pate'io bina ekia ki'a aba teore, weiana
ki'a ia'i obokia tabakia a'i patebaibeni mue. ³ Ia
ki'a ia'i obokia tabakia weiakia tebaibeni hanona
ekia ki'a tebaraona muenakia ihau ha ha aokiae.
⁴ Pokina poromakau mai nani aruarukia hanona
ki'a a'i katea'i obo 'apuanakia.

⁵ Ua buonai Keriso hanopakai emai aonai ia
Tirama ehina bena etibaha,
“Rauhubu ena barobe tabakia
abomo baibeni tabakia
a'i onuatae ainakia.
'A hauani ha oba'oruna au eu'u.
⁶ Oi baibeni tabakia irubai
teba'aranakia haukia
mai ki'a ia'i obokia tabakia
a'i oaonamo ainakia.
⁷ Ba au a'abi atibaha,
‘Tirama e, Au neia'u,
aba amai, rauhubu pukanai
pou'u tererena ihibonai
oi emu nuatae akana kababaina.’ ”

Sal 40.6-8

⁸ Keriso kori'uainai e'abi etibaha, “Barobe
tabakia, beruberu tabakia, baibeni tabakia
irubai tiba'aranakia haukia, mai ki'a ia'io bokia
tabakia oi a'i onuatae ainakia, a'i oaonamo
ainakia.” (Weiakia hanona Mose ena rauhubu
ena nuatae paunai tebaibeni.) ⁹ Murinai e'abi
etibaha, “Tirama e, Au neia'u, aba amai, oi emu
nuatae akana kababaina.” Ia hanona barobe
taearana kori'uaina ea'i parena ia ibaruana
ebakorina. ¹⁰ Iesu Keriso ehore Tirama ena
nuatae akana ebabaina, ia kipona hauanina rani

hamonai ikoinai paunai ebena baibeni tabanai eao, weianai eka ki'a ai aba hamahamaha.

¹¹ Robe haukia ikoikiai beraura ikoikiai ekia robe akakia tibabai, barobe tabakia hamokiamō tibaibeni hao baibeni hao, ia barobe tabakia weiakia hanona ki'a a'i katea'iobo 'apuanakia.

¹² Ia Keriso ehore rani hamonai baibeni tabanai eao ki'a ia'ibokia paunai, baibeni weiana hanona niaka keaomo banaibananai. Ba ia Tirama itipana taina imarikiaina 'ekanai aba emiati.

¹³ Weia ia nibai'ima keaomo Tirama kehore ti'oatana haukia kemaiainakia Keriso 'apuna ba'anai. ¹⁴ Ia baibeni tabana hamonai weiakia ekia ki'ai ebamaha mahanakia haukia ebabero harainakia keaomo banaibananai.

¹⁵ Auba Robe abomo aba kipona pou neiana ehinabe ainaka. Kori'uaina e'abi etibaha,

¹⁶ "Obiapaka hanona ni'abi,

Rani weiana murinai

Au e'u'abi'uai apa'uana

herekiae kababaina hanona neiana.

E'u rauhubu ia aokiae kahorotina

mai ia 'akokiae karerena."

Ier 31.33

¹⁷ Haeamona e'abi etibaha,

"Au ekia ki'a mai ekia beho

a'i karaona 'ini 'apuanakia."

Ier 31.34

¹⁸ Ia ki'a mai beho weiakia aba ehina haonakia paunai ki'a ia'i obokia tabakia katebaibenai hanona ena poki aba aha'i.

*Aika Kaha'ikakauma Tohana Tirama Herenai
Kahaeao.*

¹⁹ Uaho'aba'u e, ua buonai aika Iesu e'ari aruarunai tabura kaha'ina eroibe ki'a baha 'ekana aonai kahakatoto. ²⁰ Iesu hauanina e'ari hanona

i'eahuri habunina* etapana ba taeara mahama-hana mai mauri ekaikauna aika paukai. ²¹ Aika hanona mai eka robe hauna apa'uana Tirama ena maearima neiha 'ininakia. ²² Aokai ia aruaruna ekapo otaraina paunai aoka tohanai ki'a weiana aba ea'i obona, huanika abomo bei iroronai aba eutu harainakia, ua buonai bariu aika kahaka'a haha Tirama herena kahaeao mai aoka tohanai abomo mai a'ikakaumaka a'i kahabaoao baoao. ²³ E'abi'uai Tiramana hanona ena 'abi'uai kebato-hana paunai, aika eka buaben'i ha'uhina hauna kaha'i 'inina. ²⁴ Abaka kipokia kaharaona raona haeamo, ha ha kahaba taburanaka, eka raona'au kahaba ihanakia, mai namo akakia kahababai. ²⁵ Baika marea to'una akakia tibaoaoai haukia ekia hoahoai a'i kahaeao, iamo 'abaka kahaba taburanakia to'u akana kahabapa'uana Obiapaka ena rani kemai hereka hauna nahaihana aonai.

Tirama Nahuna A'i Kahakamuri aina.

²⁶ Tomobahu. Aika Keriso pouna aba ha'iobi to-hana murinai eka nuatae ai ki'a kahababai to'ona raninai, ki'a weiakia ia'i obokia baiben'i tabakia haeai ha a'i nemiaho. ²⁷ A taba muriai kerama kahata'u aina hauna hanona bakai apa'uana mai iruba ki'a obona Tirama ti'oatana haukia keba pururunakia. ²⁸ Ha'ibina hau ha Mose ena rauhubu ekabena a'i ea'i taeana raninai ihina pouna haukia rua 'ao aihau tebatohana ba hau weiana beho haunai eao teahu 'arina a'i teaoko'o aina. ²⁹ Hau ha nihore Tirama Nahuna a'i nimariki aina, ia nihore 'abi'uai apa'uana aruaruna ia ebarobena hauna taba 'abaeanai nibaona, mai Tirama ena aoko'o hoana nimaiaiinaka Aub Robena herenai ni'abi ki'aina hauna, hau weiana

* **10:20:** (20) marea robe aonai

kaharaonana ena puma kehoaina hanona aea keapa'ua aiho! ³⁰ Aika ha'io bina Tirama hanona na e'abi aiho etibaha, “Ara hore hanona e'u aka, au kahore arana kabamuena.” Haeamona etibaha, “Obiapaka kehore ena maearima kebabakainakia.” ³¹ Weiana kaha'eho mauri Tirama imana aonai kahaenouta hanona taba ki'a obona tohana!

³² Rani 'uaina aea tohma hauna katoraona muena. Tirama ena ea totabu ahina murinai haiara bo'ona toa'i ia wai hanona tobatabura. ³³ Rani baika maearima wairakiai tebapo'onimi mai te'oatanimi, abomo rani baika haiara uahomakia tea'i haukia tobarainakia. ³⁴ Wapura itunai tekaibunakia haukia tobarainakia, abomo baika tehore emi kepu tea'i 'akaumanakia raninai tobapahihi mai aonamomi, pokina to'io bina emi kepu namokia 'akikia hanona katemiaho banaibanai.

³⁵ Ua buonai emi raona taburana a'i katohabona. Pokina weianai 'arana apa'uana katoa'ina.

³⁶ Wai hanona katobapahihi pokina Tirama ena nuatae akana katobabaina murinai taba e'abi'uai aina hauna katoa'ina. ³⁷ Puka robenai Keriso robana eahuna etibaha,

“Rani papana mo ia a'i kehoma'a,
ia hanona kemai, ia a'i kemahari.

³⁸ E'u aka bero hauna hanona
mai a'ikakaumana kemauri.

Ia kekamuri aina'u raninai
au ia a'i kaonamo aina.”

Hab 2.3, 4

³⁹ Aika hanona weiakia tikamuri mai ti'akauma haukia 'abakia aha'i, aika hanona mai a'ikakaumaka bamauri kaha'ina.

11

A'ikakauma Hanona Taba?

¹ Eka a'ikakauma nihore nahabuabeni tabakia nimaiainakia taba tohakiae tiao, a'i nahaiha tabakia taba tohakiae nibaonakia. ² 'Uaina maearimakia abomo a'ikakauma neiana pau-nai Tirama ehore ebatohanakia. ³ A'ikakaumai aika ha'io bina kupa mai hanopaka tabakia ikoikiae hanona Tirama ena 'abiae terama, weiana ha'io bina nahaihakia tabakia hanona taba a'i nahaihakia haukia herekiae temai terama.

Abela, Enoka, Mai Noa Ekia A'ikakauma.

⁴ A'ikakaumai Abela hanona baibeni tabana namona Tirama ebena Kaino ena baibeni tabana etara haona, weiana ena a'ikakauma pau-nai Tirama ehore Abela ena baibeni tabana ea'i taeana abomo aka bero haunai ebaona. Ia e'ari, 'a ena a'ikakaumai ia hanona bariu ni'abi ohomo.

⁵ A'ikakaumai Enoka hanopakai ea'i taeana 'ari a'i e'io bina Tirama herena eao, ua buonai hau ha ia a'i tetabu ahina. Tirama ehore ea'i obona. Puka robenai ebatohana e'abi ia a'i ea'i taea bahana aonai ia hanona Tirama aona ebanamona. ⁶ Ia ena a'ikakauma aha'i hauna hanona Tirama aona ibanamona a'i e'io bina. Tirama herena kateao haukia hanona katea'ikakauma tohana Tirama hanona nimauri abomo titabuna haukia arakia namokia kebenakia.

⁷ A'ikakaumai Noa hanona Tirama taba wairai kerama hauna eba'ikakaumana aonai ia a'i eiha tabakia Tirama aiana ea'i taeana mai marikina aunohi ha ebabaina ba ena itu haukia ibamau-rikiae keao tou aonai. A'ikakauma weianai ia bero haunai eao Tirama wairanai ba hanopaka haukia puma rarina tehoaina.

Aberahamo Mai Sara Ekia A'ikakauma.

⁸ Aberahamo hanona Tirama ea'ikakaumana. Ia eaparina raninai aiana ea'i taeana ekaobo ena hano ehabona. Tirama e'abi'uai hano ha kebena, ia aeana keao hanona a'i e'ioquina aonai ena hano tohana ehabona. ⁹ A'ikakaumai Aberahamo eao 'abi'uai hanona, weia aiara haeai haunai eao, ia Isako mai Iakobo kipokia paraboa aokiai temiaho, ia terarua abomo 'abi'uai hamona tea'ina Tirama herenai. ¹⁰ Pokina Aberahamo hanona eba'iima Tirama kehore aiara weiana kebakorina keba'ini haraina miabawai aiaranai keao.

¹¹ Aberahamo atawana Sara ohi aba tekiro ki'a baha miori a'i patebaramana, ia a'ikakaumai hanona Aberahamo hama ai eao pokina ia Tirama ea'ikakaumana ena 'abi'uai kebatohana. ¹² Aberahamo hanona eanepaka ki'a ihobona aba e'ari 'abana, hau anepakana hamona neianai itubu rarina 'akina ebaramana ihobona kupa bihiukia 'abana 'ao poe 'anona 'abana kahatuabina hanona a'i kahatuabi orena.

¹³ Maearima neiakia ikoikiai ekia a'ikakaumai temiaho iamo Tirama ena 'abi'uai tabakia a'i tea'i bahanakia aonai te'ari, ia wairai katerama tabakia te'ioquinakia haukia teaonamo ainakia, ba murinai ia kipokia tehina pounakia ia hanona baki mai aiara haeai haukia hanopaka neiana ahana. ¹⁴ Maearima ua ti'abi aiho hanona aika ha'ioquina ia hanona ekia hano tohana titabuna. ¹⁵ Ia hano weiana 'uaina tehabona hauna patteronana raninai patemue abomo petaina. Ia ua a'i tehoma. ¹⁶ Aiara ia te'imana hauna hanona aiara namona 'akina kupa aiarana. Weiana Tirama hanona a'i nihaumaea kateaparina ekia Tirama, pokina ia aiara ha aba eba'oruna ia 'eukia.

¹⁷ Tirama Aberahamo ehobona aonai Aberahamo a'ikakaumai nahuna Isako barobe tabanai ebaona. Tirama Aberahamo herenai e'abi'uai 'aba'abana katebo'o, iamo Aberahamo nahuna hamo hamona barobe tabanai ebaona ebena. ¹⁸ Tirama Aberahamo ehina bena etibaha, "Isako haunai oi itubumu a'abi'uai ainakia haukia katerama." ¹⁹ Aberahamo ea'ikakauma Tirama hanona mai hiabuna maearima 'ari ai kebamikiri muena. Weiana hamatibaha Aberahamo hanona nahuna Isako 'ariai ea'i muena 'abana.

Isako, Iakobo, Mai Iosepa Ekia A'ikakauma.

²⁰ A'ikakaumai Isako ehore Iakobo mai Esau 'abi'uai banamona ebenakia wairai katerama tabakia abomo ehina pounakia.

²¹ A'ikakaumai Iakobo ena 'ari aba eherekai 'aki aonai ia Iosepa nahuna ha ha ebanamonakia abomo ena ikai'ini ai ehara 'au Tirama ekuti aina.

²² A'ikakaumai Iosepa ena mauri aba kepua aonai Isaraela itubuna Aikupitoai katekarahi hauna pouna ehinana abomo ehina benakia hurihana Kanana hanonai katehorena.

Mose Ena A'ikakauma.

²³ A'ikakaumai Mose hamana hinana ia erama murinai tehore bunina nawa aihau pokina teihana ia hanona miori namona, ba Aikupito Obia 'arana a'i tet'a'u aina ena rauhubu a'i tea'i taeana.

²⁴ A'ikakaumai Mose eapa'ua aonai a'i enuatae ia hanona Aikupito obia 'arana nahuna babi'ena nahunai a'i keao. ²⁵ Ia hanona enuatae Tirama ena maearima kipokia katehau haiara haeamo, ia a'i enuatae rani papana ki'a akakia a'i keaonamo ainakia. ²⁶ Mose eraonana kehau haiara Tirama etina'ana hauna paunai hanona enamo ki'a baha

ba Aikupito kepukia bo'ona a'i kea'inakia, pokina 'ara namona wairai hauna eraonana.

²⁷ A'ikakaumai Mose hanona Aikupito ehabona obia 'arana ena opuere a'i eta'u aina. Ia eba-pahihi to'ona a'i nahaihana Tiramana aba eihana 'abana. ²⁸ A'ikakaumai Mose ehore Kabanai tatuna eba'oruna, ehina benakia aruaru ai pa'abi akokia tetaronakia, ahuahu aneruna Isaraela nahukia hobohobo miorikia pakakia a'i meahu 'arinakia marikina.

*Isaraela Haukia Bo'ona Tirama
Te'aikakaumana.*

²⁹ A'ikakaumai Isaraela haukia hanona 'Aku birona tekabananai hano 'ororonai tekabananai 'abana, ia Aikupito haukia tebabobona katekabananai aonai ikoikiai 'akuai tetono 'ari.

³⁰ A'ikakaumai Isaraela haukia Ieriko aiara parabuna apa'uana tekakaiarona wapu 'abaihau hamomo hanona epobu.

³¹ A'ikakaumai Rahaba maha porepore babi'ena hanona Isaraela ekia ihaihapai haukia rua ebarai harainakia. Ia Tirama a'i tea'i taeana haukia* te'ari aonai Rahaba hanona emauri.

³² Ba bita karobahu ainakia? Gideon, Barak, Samson, Idfeta, Davida, Samuela mai mahabanai haukia poukia kakikipanakia ranina hanona aba aha'i. ³³ Ia ekia a'ikakaumai tehuari hanopaka bo'ona tea'i ki'anakia, bero akakia tebabai, Tirama ena 'abi'uai tabakia tea'i, ia tehore laiona pinakia tekaibunakia, ³⁴ iruba apa'uakia teba'aonakia, kareba mahanai ter-obo mauri. Te'abe'abe ia haeamona tetabura mue, huari ai tetabura ki'a atau'a haukia to'una

* **11:31:** (31) 'ao a'i tea'ikakauma haukia.

teu'unakia. ³⁵ Babi'e baika hanona hatia'akia te'ari haukia temikiri mue tetabu ahinakia, baika teba wapurankia irubukia a'i tenuatae pokina kateahu 'arinakia aonai mikiri mue namona 'akinai katemauri paunai.

³⁶ Baika hanona tebatae ainakia te'atinakia, tebirinakia wapura itunai tekaibunakia.

³⁷ Pihara ai teahu 'arinakia, teiri boanakia rua, kareba ai tehara 'arinakia. Mamoe mai nani paruakia tehainakia tekaoao, teuraru, te'oatanakia, mai tea'i ki'anakia. ³⁸ Hanopaka hanona ena namo ha aha'i ia herekiai. Ia hanona hano aha'i haukia 'abanai tekaoao, hano'akunai, oeo ai, pihara 'ererekiai mai 'uriai temiaho.

³⁹ Neiakia ikoikiai hanona mai ekia a'ikakauma Tirama ehore ebatohanakia, iamo Tirama e'abi'uai anikia hanona a'i tea'i. ⁴⁰ Pokina Tirama hanona ena raona namona 'akina eba'oruna aika 'euka. Ena nuatae hanona 'uainai tea'ikakauma maearimakia mai aika kipokia maearima aba te'oru haukai kahaeao haeamo.

12

Iesu Kahaihana Mai Kaha'ikakauma.

¹ Weiakia a'ikakauma maurinai temiaho haukia bo'okia hanona baiaruru haukia 'abakiai tekori kakaiaronaka paunai, aika taba weiakia tibapumanaka mai ki'a weiakia tia'i 'ininaka haukia ikoikiai hama'i obonakia, ba mauri beauna wairakai nimai haunai hamabeau mai bapahihika. ² Aika mahaka hanona Iesu mo kahaihana, ia ehore aika eka a'ikakauma ebaramana popounai keaomo puanai, ia hanona wairai nemiaho aonamona paunai ebapahihi a'i ehaumaea matiu ibiri ropo haiarana echoaina

ubinai e'ari, ba ia bariu hanona weia Tirama ena imia'au itipana taina imarikiaina 'ekanai aba emiati.

Tirama Puma Kebenaka Hanona Kahabero.

³ Wai ia katoraona haraina, ia aka ki'a haukia te'oatana aonai ebapahihi benakia, ba wai kipomi aomi a'i tomone'e 'abaeana a'i tomohau hororo ta'un. ⁴ Wai hanona ki'a kipokia tohuari, iamo a'i to'au tabura a'i teahu 'arinimi. ⁵ Tirama ehore nahunai ebaonimi aomi ebataburanakia 'abina aba toreana, 'u? Etibaha, "Naha'u e, Obiapaka nirobenimi hanona aiana katobahuaina, haeamona nerikenimi hanona aomi a'i katone'e 'abaeana.

⁶ Pokina Obiapaka
niraona'au ainakia haukia
nirobenakia, abomo nahunai
nibaonakia haukia ni'atinakia."

Her 3.11, 12

⁷ Emi hauhaiara katobapahihi aina, weiana hanona hamami ena bairobe. Pokina Tirama ni-hore nahunai nibaonimi. Hama tabana nahuna a'i nirobena? ⁸ Maearima ikoikiai nahukia tirobenakia. Wai a'i kerobenimi raninai wai hanona tubu miorimi nahuna tohami aha'i. ⁹ Aika ikoikai mai hamaka hanopaka neiana ahnai tirobenaka ba aiakia naha'i taeanakia. Aika hanona mai Hamaka kupai hauna aiana kahaka'ai harai hanona kahamauri. ¹⁰ Aika hamaka hanopakai neia haukia ekia bero ai rani papana tirobenaka, ia Tirama nirobenaka hanona aika eka namo paunai, ba ia kipokia ena robe maurina aonai kahamiaho haeamo. ¹¹ Hama nahu tirobenakia raninai mai haiarakia ia aonamona aha'i, ia

muriai weiakia tehaiara tepuma hoai haukia hanona baibua buabuana namona katea'ina aka bero haukiai kateao.

¹² Weiana buonai imami timahe haumi tomoa'i taea mai aemi ti'abe'abe haumi tomobapahihi tomomikiri. ¹³ Taeara berokiai katoka'a, weiana aekia teki'a haukia taeara weianai aekia katenamo.

¹⁴ Wai tomobahobo maearima kipokia mai baibuami katomiaho mai robemi katomiaho, pokina a'i kerobe hauna hanona Obiapaka a'i keihana. ¹⁵ Ha ha kato'ima harainimi, hau ha Tirama ena aoko'o hoanai a'i mekapu marikina, 'ao baiatamiai hau ha ramu mabina 'abana a'i me'omu 'au mako a'i mebaro'arinimi mai a'i meba'opunimi marikina. ¹⁶ Kato'ima harainimi, baiatamiai hau ha a'i kenabau, 'ao auba akana a'i timariki aina haukiai a'i temeao marikina ihibona Esau 'abana, ia hanona ani-ani 'ororo hamona paunai ena rama'uai hoana banamona maikoinai eba'akaumana. ¹⁷ Aba to'ioina, muriai Esau hanona hamana herenai ena rama'uai hoana banamona ia'ina enuateae enoi mai haihaina, iamo hamana ekamuri aina, ia Esau hanona ena rama'uai hoana banamona kea'i muena taearana ha a'i etabu ahina.

Aika Aba Hakara'au Kupa Ierusalemana.

¹⁸ Wai tomai 'ekana hanona 'uainai Isaraela haukia teao Sinai oeona 'abana aha'i. Sinai oeona hanona imakai kaha'i 'apuana ketaina, iruba ni'ara, 'auhao 'umuna mai wapura ekaabuna, abomo kou eabu, ¹⁹ pihī 'uruna mai aia rarina teona. Ba maearima weiakia aia teona haukia Mose tenoina Tirama ia herekiai 'abi ha a'i kehina muena. ²⁰ Pokina maearima weiakia Tirama

e'abi benakia hauna tet'a'uai ki'a bahana, ia e'abi etibaha, "Maearima ha keao oeo neiana imanai kea'i 'apuana hanona piharai kateahu 'arina, mahi ha re'a uamo katehomana." ²¹ Mahakia eao hoa rarikia teihanakia tet'a'u ki'a, Mose abomo e'ururu 'ururu e'abi etibaha, "Nata'u ki'a baha."

²² Ia wai tomai 'eka neiana hanona Siona oeona, mauri Tiramana ena aiara, kupa Ierusalemana. 'Eka weiana aonai aneru to'una rarinia 'akina mai aonamokia temiaho. ²³ Wai tomai nahu pakakia 'abanai katoao atami kupai terere haukia ekia aonamo to'u apa'uana herena, maearima ikoikiai ibabakaikia hauna Tiramana herena, mai aka bero haukia weiakia aubakia aba tebero harai haukia herekia. ²⁴ Wai tomai Iesu 'abi'uai apa'uana mahamahana ebairara aina hauna herena, mai ia aruaruna ki'a ia'i obokia hauna herena, aruaru ikapo otarai hauna weiana hanona Abela aruaruna 'ara hore enuatae aina hauna etara haona.

Kaha'ima 'ima Harainaka.

²⁵ Kato'ima harainimi, nehina benimi hauna aiana a'i kato baoaoaina. Weiakia hanopakai Tiramana ena 'abi ebena hauna Mose tebaoaoaina haukia hanona puma tehoaina. Aika kupai nirobenaka hauna kahabaki'ana raninai puma kemai hauna herenai aea kahakapare aiho? ²⁶ Rani weianai ia aiana ehore hanopaka ebaibiuna, ba bariu hanona e'abi'uai etibaha, "Au hanopaka haeamona kabaibiuna, hanopaka mo aha'i, ia kupa abomo." ²⁷ 'Abi neiana "haeamona" anina hanona weiakia terama tabakia kateibiu haukia ikoikiai kea'i parenakia, ia taba baika a'i kateibiu haukia hanona 'ekakiai katemiaho.

²⁸ Tirama niobia aina aiarana a'i neibiu hauna ebenaka kipokia kahaobia aina paunai banamo apa'uana Tirama kahabena, kahakuti aina mai marikika abomo mai ta'uka ia kahabananamona. ²⁹ Pokina aika eka Tirama hanona iruba apa'uana tohana 'abana taba ikoikiai niba'aranakia.

13

'Abaka Ha Ha Kaharaona'auai To'onaka.

¹ Wai ha ha kipomi katoraona'auai to'o baihanimi uaho'aba hamona 'abana Keriso aonai. ² A'i katoreana, baki haukia hanona katoa'i taeananakia emi ituai, pokina baika tehore ekia ituai baki haukia tea'i taeananakia aonai aneru tea'i taeananakia, ia kipokia hanona a'i te'iorina.

³ Wapura itukiae tekaibunakia haukia katoraonanakia, ihobona wai abomimo ia kipokia patekaibunimi 'abana. Maearima tihore tiba haiaranakia haukia abomo kato raonanakia, ihobona wai abomimo tuhaiara 'abana.

⁴ Maearima ikoikiae hawainibe katemariki aina hanona kenamo. Hau mai babi'e atawami kipokia emi hawainibe hoana kato'ima haraina hanona kenamo, pokina Tirama kehore maha porepore maearimakia abomo hawainibe aonai tinabau ki'a maearimakia hanona kebabakainakia.

⁵ Moni a'i katonuatae ai ki'a bahana ia taba heremiai temiaho haukia mo katoa'i aomi kenamo, pokina Tirama e'abi etibaha,
“Au hanona a'i kahabonimi abomo
a'i kareanimi, aha'i 'akina.”

⁶ Ua buonai mai taburaka kaha'abi kahatibaha,
“Obiapaka hanona au ibarai'u

Deu 31.6

hauna, au a'i kata'u.
Maearima taba katebabaina
au here'uai?"

Sal 118.6

⁷ 'Uainai te'uai ainimi Tirama ena 'abi teba'iohi
ainimi haukia kato raonanakia. Ekia mauri ka-
toraonana aea temiaho aiho eao mo te'ari, ba ekia
a'ikakauma hoana katobahobo hoboaina.

⁸ Iesu Keriso hanona warani, bariu abomo
mara a'i kehaeai keaomo banaibanal. ⁹ Ba'iohi
'abikia haeai haeai a'i katehore taeara namonai
a'i katebaka'a parenimi. Namona hanona Tirama
ena aoko'o hoana kehore aomi keba taburanakia,
anianian rauhubukia a'i katoba apa'uanakia. Pok-
ina weiakia aniani rauhubukia tea'i taeanakia
haukia hanona namo ha a'i tetabu ahina.

¹⁰ Aika hanona mai eka itara robena, weiana
hanona matiu ibiri ropo 'ubinai Iesu e'ari hauna,
robe haukia weiakia paraboa aonai ekia robe
akakia tibabai haukia katemai eka itara robena
weianai kateaniani hanona ekia bero aha'i.
¹¹ Pokina mahi aruarukia hanona robe hauna
apa'uania eaoainakia erobe ki'a baha 'ekana
aonai etotoainakia ki'a ia'iobokia paunai, 'a
huanikia hanona eaoainakia aiara parabuna
murinai ehuhunakia. ¹² Ihobonai Iesu abomo
kipona aruarunai maearima ekia ki'ai kebamaha
mahanakia paunai aiara parabuna murinai ehau
haiara e'ari. ¹³ Ua buonai aika abomo ia her-
ena kahaeao, aiara parabuna murinai ia ehau-
maeaina hauna kipokia kaha haumaea haeamo.

¹⁴ Hanopaka neiana aonai aika eka miao ba-
naibanal aiarana ha aha'i, aika hanona aiara
weiana wairai nimai hauna naha'imana. ¹⁵ Ua
buonai aika rani ikoinai Iesu atanai Tirama ba-
namo kahabena, aika kahahore pinakai ia atana

kahapaina, weiana hanona aika eka baibeni tabana Tirama 'euna. ¹⁶ Aka namokia abomo 'abami ibaraikia akakia a'i kato reanakia, pokina aka uahomakia hanona baibeni tabakia Tirama niaonamo ainakia.

¹⁷ Te'uai ainimi haukia aiakia katoka'aina mai tenuataeai akakia katbabainakia. Pokina ia ti'hore wai te'imanimi Tirama wairanai mai ta'ukia, a'i tioro. Aiakia katoka'aina hanona mai aonamokia ekia aka katebabaina, ia mo aiakia a'i katoka'aina raninai mai raona raonanakia kateaka, ba weiana 'eumiai hanona baraibaraina aha'i.

¹⁸ Rani ikoinai katobahuba'ari ai ahamai ai. Ai tarona haraina aomai tohakia hanona tebero pokina taba ikoikia aokiae tanuatae aka berokia katababai. ¹⁹ Au nano'inimi kato bahuba'ari tabura Tirama keuhuna'u kawahi biai heremi.

Banamo 'Abina Orena.

²⁰ Baibua Tiramana ehore Obiapaka Iesu 'ari haukia baiatakiai ebamikirina, ia hanona mi-aho banaibanai 'abi'uaina apa'uana aruaruna ekiki oioi ba mamoe 'ima hauna apa'uanai eao. ²¹ Au nabahuba'ari, Tirama neiana kehore taba namokia ikoikiae kebenimi pokina ena nuatae akana katbabaina paunai, Iesu Keriso atanai ia niaonamo aina akana aokai kebabaina. Keriso herenai nuabi kemiaho banaibanai. Amen.

²² Uaho'aba'u e, marere neiana arere benimi 'abikia hanona a'i tehoma'a, ia e'u batabura 'abikia neiakia katoa'i taea tohanakia. ²³ Naba'ibinimi uaho'abaka Timoteo wapura itunai aba tebakarahina, ia pemai biai raninai tararua patawahi pataihanimi.

24 Te'uai ainimi haukia ikoikiai mai Tirama ena maearima ikoikiai herekiai e'u banamo 'abina katohina benakia. Weia Italia ai temiaho haukia ekia banamo 'abina tetiu ahina heremi.

25 Tirama ena aoko'o hoana hanona ikoimiai heremiai kemiaho. Amen.

**'Abi'uai Apa'uana Mahamahana
The New Testament in the Waima Language of Papua
New Guinea
Nupela Testamen long tokples Waima long Niugini**

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 22 Feb 2024 from source files dated 31 Aug 2023

cec16783-6218-5812-9255-85478fb5e61c